

Concepto di ley prohibicion uzo saco di plastic por pasa Parlamento e aña aki ainda



ORANJESTAD (AAN): Parlamentario Donny Rasmijn, di fraccion di AVP, kende ta un di esnan cu a traha riba e concepto di ley pa prohibi uzo di saco di plastic, a splica cu a mira un tardanza pa entrega di esaki na Parlamento.

E concepto aki a cana su caminda, inclusive a pasa den man di Raad van Advies cu a duna algun sugerencia di cambio, cu e fraccion di AVP

ta trahando riba dje aworaki. “E consehonan aki ta hopi baliioso, ya cu si nos inclui nan, e ta duna nos mas posibilidad cu e ley tin un resultado efectivo,” Parlamentario Rasmijn a splica.

Un par di punto importante den e conseho tabata: con ta bay controla e funcionamiento di e ley, esta controla e tiendanan pa no haci uzo di saconan di plastic. Con ta

bay promove of conscientisa e no uzo di saco di plastic y con ta bay financia e campananan aki. E ta bay tuma un tiki tempo awor pa finalisa cu e ahuste di e ley y demostra principalmente cu tin forma pa controla e no uzo di saconan di plastic. E cambionan ta evita cu ta aproba un ley cu ta bira un ley morto cu no ta wordo ehecuta.

Parlamentario a splica cu den



e presupuesto cu a trata recientemente tin un suma cu a wordo poni den e post di e departamentonan concerni pa opleiding pa polisnan extraordinario. E personanan aki a haya aprobacion caba di Minister pa haci e controlnan necesario.

E ta spera cu den mas o menos 3 siman lo finalisa cu e ahuste pidi door di Raad van Advies y entrega pa aki dos luna e ley por wordo aproba y bay den ehecucion. Ta spera cu den e mesun tempo lo cuminsa cu e curso pa esnan encarga pa tene e controlnan. “Nos ta wak cu hopi tienda y persona a tuma e decision pa no uza e saconan di plastic, y ta uza tasnan special. E ta demostra cu e ciudadanonan kier pa e ley aki dreठा na vigor. Y tiendanan tin tasnan special cu a wordo traha. E ta bon pasobra

na final di compras no tin hopi saco pa piki. Mi ta kere cu e cultura ta cambiando y nan ta en espera di e ley aki.”

Saco di plastic y foam box ta haci un daño grandi pa medio ambiente. No solamente e ta duna un mahos bista pero e material ta tarda masha hopi wordo procesa door di naturalesa. Segun Rasmijn, tin un grupo cu no ta consciente ainda di daño cu e materialnan aki ta causa y otro grupo cu ta consciente pero ta prefera sigui uze pasobra no tin e leynan necesario. Y finalmente tin un grupo cu ya caba ta uzando otro tipo di saco, ya cu nan kier contribui na proteccion di nan pais.

Na final el a duna di conoce cu e ta kere cu pueblo lo duna su contribucion pa e ley aki bira uno exitoso.